

Manifiestu EuroMarches 2015



Por una Europa de les persones, dicimos ¡valió! a la Europa del capital

Cada vez más persones, ciudadanes de la que llamen Unión Europea, acaben el día perdiendo'l trabayu o viendo amenorgaos y cuestionaos los sos derechos a una vivienda y a una salud dignes, a una educación igualadora o a unes pensiones amañoses. La crisis financiera foi la escadiella perfecta del capitalismu globalizáu pa recortar al mínimu los derechos ciudadanos y quita-yos a los pueblos la soberanía democrática.

Conocemos perbién al opresor, el tradicional poder tiránicu de los mui ricos, que güei tresformóse en totalitarismu financieru afitáu nos nuestos propios aforros xestionaos polos sos bancos; pero tamién deprendimos a conocer y quita-yos la mázcara a los políticos que tán escoyíos pa servir al pueblu y, pelo contrario, sirven al poder del dineru y pauten antidemocráticamente les normatives europees col capital y non cola ciudadanía.

- Cuando los nuestos representantes asitien la democracia debaxo de la codicia de los mercaos, tenemos de dicir “¡valió!”
- Cuando la Troika nos ta afogando con una delda soberana ilexítima qu’aniciaron los bancos, y-y dan prioridá a pagala enantes qu’a cualquier gastu social, llegando a fundir pueblos, como'l griegu, na esclavitú, tenemos de dicir “¡valió!”
- Cuando a los países del sur d’Europa se nos ñega, cola Europa monetaria y el pautu del Euro, la posibilidá de facer polítiques autónomes pa tornar esti insoportable nivel de paru y salir de la crisis, tenemos de dicir “¡valió!”
- Cuando la mayoría de parlamentarios europeos tienen votao promover un tratáu de llibre comerci u ente EEUU y la UE, el TTIP (Alcuerdu Tresatlánticu pal Comerci u y la Inversión) que va dexar a las tresnacionales operar ensin dar cuentas a les instituciones democrátiques o mesmo poder procesar a los gobiernos énte tribunales especiales ensin control democráticu, si-yos da por defender l’interés xeneral perriba del llibre mercáu, tenemos de dicir “¡valió!”
- Cuando n’Europa hai paraísos fiscales que caltienen normes pensaes p’aidar a les persones riques y a los grandes capitales y empreses, que lleventen plataformes p’esconder, evadir y

facer fraude fiscal; pa los negocios puercos; la especulación financiera o pa llavar el dineru de los corruptos y del crime organizáu, tenemos de dicir “¡valió!”

- Cuando'l nostru mediu ambiente, montes, atmósfera, ríos y mar siguen estrozándose ensin implementar midíes radicales y amañoses pa poder tornar la situación y ensin que se respeten los alcuerdos y midíes que yá tán afitades internacionalmente, tenemos de dicir “¡valió!”
- Cuando siguen ensin facese polítiques afechisques que garanticen la igualdá de xéneru, desanicien el machismu y acaben cola violencia contra les muyeres, tenemos de dicir “¡valió!”
- Cuando se levanten muries físiques y ilegales (como la Directiva de la Emigración o de la vergoña) a persones qu'afuxen de la guerra, la miseria y la enfermedá; y cuando s'aprueben polítiques qu'albidren una Europa racista, xenófoba ya insolidaria, tenemos de dicir “¡valió!”
- Cuando esta Europa pon per delante los intereses financieros y de mercáu a los derechos humanos y el bientar social, privatizando servicios públicos, tresformando a los ciudadanos en clientes y rebaxando los derechos sociales (vivienda, agua, sanidá, educación, dependencia), lo qu'acaba mancando a los más vulnerables, tenemos de dicir “¡valió!”

Esa Europa naguada, democrática, igualitaria, social, xunta y pacífica, que tanta xente suañó depués de la segunda Guerra Mundial, frustróse. Pa la xente y pa los pueblos d'Europa ésti ye un momentu desesperante.

Vese bien que tamos nun momentu d'emergencia social y cívica nel que la democracia ye valiosa por demás pa dexala nes manes de los mercaos. Los gobiernos cuantayá qu'entregaron les armes al capital y los medios de comunicación esparden y aplauden les sos polítiques sangrines. Facemos un llamáu a la ciudadanía a la rebelión cívica contra la dictadura bancaria. Aportó la hora de que la ciudadanía garre'l so papel históricu de rebelión contra la tiranía de los pocos, esixendo otra Unión Europea al serviciu de les persones y non del capital.

Darréu d'esto, dellos movimientos sociales y organizaciones polítiques y sindicales tenemos planificao una aición conxunta de los pueblos d'Europa, les EUROMARCHES 2015. Ente los días 1 y 17 d'ochobre de 2015 los pueblos de Europa muévense mirando a Bruseles pa pidir un cambéu radical de las polítiques de la Unión Europea.

Nel Estáu español, al llau de los demás miembros de la Unión Europea tamos organizándonos pa los actos d'estos días. Convidámosvos a les persones y entidaes a participar.

Pola xuntura de la ciudadanía europea, contra la Europa del capital y pola Europa de les persones, democrática, social, ambiental y solidaria

**Participa nes EUROMARCHES 2015
Xibraltar - Bruseles del 01 al 17 de ochobre**

<http://euromarchas2015.net/>
euromarchas2015@gmail.com

**¡VALIÓ!, OXI, ENOUGH
Vamos llevar otra Europa**